

UPA 2017/111: Inuup sananeqaataasa ilisarnaataannik qitiusumik nalunaarsuiffik pillugu inatsisip atuutilersinneqarneranik peqqussutissamut siunnersuut aamma inuup sananeqaataasa ilisarnaataannik qitiusumik nalunaarsuiffik pillugu inatsisip, eqqartuussisarneq pillugu inatsisip aamma qamutininik assakaasulinnik nalunaarsuisarneq pillugu inatsisip allanngortinneqarnerannik inatsimmi § 1-ip Kalaallit Nunaannut atuutilersinneqarneranik peqqussutissatut siunnersuummut (Naalagaaffinnik Den Europæiske Unionip avataneersunik inuup sananeqaataasa ilisarnaatai, pussuit ipaasa assilineqarnerinik aamma qamutit pillugit paasissutissanik paarlaateqatigiittarneq) Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuut.

pillugu

Inatsisinut Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Iddimangiiu Bianco, Inuit Ataqatigiit, siulittaasup tullia
Inatsisartunut ilaasortaq Laura Táunâjik, Siumut
Inatsisartunut ilaasortaq Debora Kleist, Inuit Ataqatigiit
Inatsisartunut ilaasortaq Per Rosing-Petersen, Partii Naleraq

1. Siunnersuutip imarisaa tunuliaqutaalu

Inuup sananeqaataasa ilisarnaataannik qitiusumik nalunaarsuiffik pillugu inatsisip Kalaallit Nunaannut atuutilersinneqarnissaa, peqatigitillugulu tamatumunnga inatsisip allanngortinneqarneranik inatsisip Kalaallit Nunaannut atuutilersinneqarnissaa aalajangiiffigisassatut siunnersuummik siunertaavoq. Inatsimmut allannguut sulii Danmarkimut atuutisilarsinneqanngilaq.

Inuup sananeqaataasa ilisarnaataannik qitiusumik nalunaarsuiffik pinerluutinik, inuup pinerluttup sananeqaatsimi ilaanik (assersuutigalugu nutsanit, amiminermi, aammit, qisimit imaluunniit anisuumit pisumik) qimatsivigisimasaa paasiniaanermi politiinit atornerqartarpoq.

Inuup sananeqaataasa ilisarnaataannik qitiusumik nalunaarsuiffimmi ilaatigut sananeqaatsit mikinerit ilisarnaataat pinerluffiusuni allanilu nassaarineqarsimasut, ilaatigullu inunnit

minnerpaamik ukiup aappaa affaq pillaatissiissutaasinnaasumik pinerluuteqarsimanermut unnerluutigineqarsimasunit, sananeqaatsit ilisarnaataat (qisermi tigusat) toqqortaatigineqarput¹.

Aalajangiiffigisassatut siunnersuummut tunngavilersuutini oqaatigineqarpoq, inuup sananeqaataasa ilisarnaataannik nalunaarsuiffiup pingasunik peqquteqarluni politiit pinerluutini paasisaqarnissaminnut periarfissaat pitsanngoriartissinnaagai:

- 1) Pinerluffiusimasuni kinaassusersineqanngitsunit inuup sananeqaataasa ilisarnaataannik nassaarineqartunik inuit kinaassusersineqareersut ilisarnaataannik nalunaarsuiffimmi pigineqareersunut sanilliussinissamut politiit periarfissaqalissapput.
- 2) Pinerluttoq sananeqaatsimi ilisarnaataannik qimataqarsimatillugu, tunngavissaqanngitsumik pasisaasunut sammisumik taamaattoqannginnerata piaarnerusumik uppersarsarneqarsinnaalerneranik inuup sananeqaataasa ilisarnaataannik nalunaarsuiffik periarfissiisaaq.
- 3) Inuup sananeqaataasa ilisarnaataannik nalunaarsuiffiup, inuup ataatsip pinerlunnerni arlalinni sananeqaatsimi ilisarnaataannik qimataqarsimaneranik politiit uppersarsaasinnaalersissavai. Inullunniit taanna suli kinaassusersineqarsimannikkaluarpat ilisimasaq taamaattoq politiit paasiniaaneranni pingaarutilimmik sunniuteqarsinnaavoq.

2. Inatsisinut Ataatsimiititaliap isumaliutai:

Aalajangiiffigisassatut siunnersuummut tunngavilersuutini allassimavoq, inuup sananeqaataasa ilisarnaataannik qitiusumik nalunaarsuiffimmik pilersitsinissaq aalajangiiffigisassatut siunnersuutikkut siunertarineqartoq.

Ataatsimiititaliali paasinninnera tassaaavoq, tassa inuup sananeqaataasa ilisarnaataannik qitiusumik nalunaarsuiffik pillugu inatsisip Kalaallit Nunaannut atuutsinneqalerneratigut immikkut Kalaallit Nunaannut inuup sananeqaataasa ilisarnaataannik nalunaarsuiffimmik nutaamik pilersitsisoqassanngitsoq, tamatumunngali taarsiullugu danskit inuup sananeqaataasa ilisarnaataannik qitiusumik nalunaarsuiffiata annertusineqarnissaa pineqartoq, taamaalillutik inuup sananeqaataasa ilisarnaataat Kalaallit Nunaanni pigineqartut nalunaarsuiffimmut tassunga ilanngutsinneqarlutik, taamaalillutillu Kalaallit Nunaanni politiit nalunaarsuiffimmik taassuminnga atuisinnaalerlutik.

Inatsisinut Ataatsimiititaliap paasinninnera malillugu Kalaallit Nunaanni politiit inuup sananeqaataasa ilisarnaataannik qitiusumik nalunaarsuiffimmiit paasissutissanik ullumikkut aallersinnaanngillat, peqqussutikkulli tamanna ajornarunnaassaaq.

Peqqussummut missingiummi § 5, imm. 2-p naalagaaffinni EU-mut ilaasortaasuni inatsisit atortinneqarnerannut oqartussaasut (politiit il.il.) pillaatissiinermut suliani paasiniaanerminnut

¹ Kalaallit Nunaanni pinerluttulerinermut inatsit pillaatissiissutinut killiliissutinik imaqqanngimmat, nalunaarsuiffik Kalaallit Nunaannut tunngatillugu inuit "inatsisunik unioqqutitsinermut immikkut peqqarniitsumut" unnerluutigisaasut/simasut sananeqaataasa ilisarnaataannik imaqqassaaq.

atatillugu atugassanik inuup sananeqaataasa ilisarnaataannit paasissutissanik qitiusumik nalunaarsuiffimmut aallersinnaatippai.

Inatsisinut Ataatsimiititaliap paasinninnera malillugu peqqussutip Danmarkip saniatigut aamma naalagaaffinni EU-mut ilaasortaasuni politiit Kalaallit Nunaanni inuup sananeqaataasa ilisarnaataannik tamakkunanngalu misiliutinik aallersinnaalersissavai, taamaattorli Kalaallit Nunaanni politiit paasissutissanik taamaattunik naalagaaffinnit EU-mut ilaasortaasunit pineqartunit aallersinnaalersinneqassanatik.

Inatsimmut allannguutip sulii atuutsilersinneqanngitsup, nunat allat (EU-mut ilaasortaanngitsut) aallersinnaalernissaannut Justitsministeri akuersisinnaalersissavaa. Aaqqissuussinerup taassuma aallarniutigalugu USA-mut tunngatillugu atorineqarnissaa ilimagineqarpoq, matumani peqqarniisaartoqartarneranik allatullu peqqarniitsumik pinerluuteqartarneranik akiuiniarneq siunertaralugu inussat ipaat inuillu sananeqaataat pillugit paasissutissanik paarlaasseqatigiittarnermut isumaqatigiissummut atatillugu.

Inuup sananeqaataasa ilisarnaataannik qitiusumik nalunaarsuiffik marlunnik immikkoortoqarpoq: paasissutissat nassaarineqartartut pillugit immikkoortoq kiisalu immikkoortoq inunmut tunngasoq.

Paasissutissanut nassaarineqartunut tunngasortaani sananeqaatsinut ilisarnaatit pinerluffiusimasumi atortussianit assigiinngitsunit, inunnit imaluunniit sumiiffinnit pinerluuteqarnermut atatillugu aqqusaarsimasanit nassaarineqarsimasut nalunaarsorneqartarput.

Inummut tunngasortaani inunnit “inatsisinik unioqqutitsinermut immikkut peqqarniitsumut” unnerluussaasunit imaluunniit unnerluussaasimasunit sananeqaatsit ilisarnaataat nalunaarsorneqartarput. Qanoq “inatsisinik unioqqutitsineq immikkut peqqarniitsoq” paasineqassanersoq Inatsisartunut ilisimatitsissutigineqarsimanngilaq. Inatsimmi Danmarkimut atuuttumi piumasaqaat ullumikkut ima oqaasertalerneqarsimavoq, tassa inuk minnerpaamik ukiup aappaa affarmi pillaatissinneqaataasinnaasumik inatsisinik unioqqutitsinermut (unioqqutitsisimanermulluunniit) unnerluussaasimasariaqarpoq (imaluunniit siusinnerusukkut unnerluussaasimasariaqarluni) imaluunniit pillaatissiisarnermut inatsimmi atoqatigiittunik isiginnaagassianik meeqqanit peqataaffigineqartunik (børnepornografi) tigummiarneq pillugit aalajangersakkanik unioqqutitsinermut unnerluussaasuulluni.

Inatsimmi Danmarkimut qangaanerusoq atuuttumi piumasaqaat ima oqaasertalerneqarsimavoq, tassa inuk pillaaarnermut inatsimmi aalajangersakkanik arlalinnik erseqqinnerusumik nassuiaatigineqartunik amerlanertigut peqqarniitsuusartunik unioqqutitsisimanermut unnerluussaasuusaaq (unnerluussaasuusimassalluniluunniit). Inatsilli

2005-imi allanngortinneqarpoq, taamaalillutillu inuit inuup sananeqaataasa qitiusumik nalunaarsuiffimmi nalunaarsorneqartut malunnaatilimmik amerleriarput.

Sananeqaatsit ilisarnaataat pillugit paasissutissanik inummut tunngassutilinnik isertuuttarialinnik imaqartunik siusinnerusumut naleqqiullugu amerlanerungaartunik katersisoqarnissaanik toqqortaateqartoqaleraneranillu, inuullu sananeqaataanik nalunaarsuiffimmi namminermi nalunaarsorneqartut amerlerujussuarnerannik nassataqassasoq, tusarniaassutigineqarnerani akissummini Datatilsynip inatsimmut allannguut pillugu oqaatigaa. Tamanna tunngavigalugu Datatilsyni isumaqarpoq inuup sananeqaataasa ilisarnaataannik nalunaarsuiffimmik malunnaatilimmik annertusisitsinikkut pinerluutitik sunniutilimmik paasiniaasinnaaneq, paasissutissanik inummut tunngassutilinnik isertuuttarialinnik katersuinissap toqqortaateqarnissallu killilersimaartariaqarnissaanut illuatungiliutillugu oqimaalutarneqartariaqartoq, siunnersuullu aatsaat atuutsinneqalertariaqartoq inuiaqatigiit eqqarsaatigalugit mianersuutassat pingaarutillit tamatuma pissusissamisoorneranik tikkuussippata.

“Inatsisinik unioqquitsinermut immikkut peqqarniitsumut” unnerluutiginnissinnaanermut piunasaqaatip assingusup sumik imaqarneranik paasinninnissamut inatsisimmi Danmarkimut ullumikkut atuuttumi killiliineq sunniuteqarsinnaasorinarpoq. Tamanna ilaatigut aamma inuit assersuutigalugu tillinniarnermut unnerluutigineqartut nalunaarsuiffimmut ilanngutsinneqarnerannik nassataqarsinnaavoq.

Nalunaarsuiffimmi paasissutissat suliani inuup sananeqaataanik qimatsiviusuni tamani paasiniaanermi politiniit atorneqarsinnaapput. Tassa suliani “inatsisinik unioqquitsinermut immikkut peqqarniitsumut” (imaluunniit Danmarkimisut: minnerpaamik ukiup aappaa affaq pillaatissinneqaataasinnaasumik inatsimmik unioqquitsisimanermut) unnerluussaananermut tunngassutilinni taamaallaat atuunnani.

Inuup sananeqaataa pillugu paasissutissaq aatsaat ullormi pineqartup 80-iliiffiani nalunaarsuiffimmit peerneqassaaq. Pineqartoq tamanna sioqqullugu toqussagalarpat, toquneraniit ukiut marluk qaangiutinnginneranni paasissutissaq peerneqariissaaq. Pineqartoq pinngitsuutitaappat imaluunniit uppernarsaatit amigarnerat pissutigalugu politit unnerluutiginninnissartik unitsiinnarpassuk, paasissutissaq ukiut qulit qaangiuppata peerneqassaaq.

Qanoq annertutigisumik inuit siusinnerusukkut unnerluutigisaasimasut pineqaatissinneqanngitsulli nalunaarsuiffimmut ilanngutsinneqarnissaat pillugu apeqqut inatsisip akuersissutigineqarnera sioqqullugu oqallisiginninnermut annertuumut tunngavissiivoq.

Tapersersuisut tikkuarpaat inuit kingorna pineqaatissinneqaratik suliami unnerluutigineqarsimasut inunnut suliani unnerluutigineqarsimannngisaannartunut naleqqiullutik kingusinnerusukkut pinerlunnermut allamut pineqaatissinneqaratarsinnaanerusartut.²

Aammattaaq erseqqissaatigineqarpoq inuit siusinnerusukkut assersuutigalugu pinngitsaaliilluni atoqateqarsimanermut unnerluutigineqarsimasut – taamaattorli pineqaatissinneqarsimannngitsut – politiit sulianik assingusunik paasiniaanernnut atatillugu ugartorneqaratarsinnaanermut qaninnerusartut. Pineqartup sananeqaataasa ilisarnaatai nalunaarsuiffimmiippata suliamilu nutaami inuup ilisarnaataanik qimatsisoqarsimappat pineqartorlu pinngitsuuppat tamanna piaarnerusumik uppernarsineqarsinnaassaaq. Taamaallilluni pineqartup politiinit killisiorneqarnissaa apersorneqarnissaalu pinngitsoortinneqarluni.

Institut for Menneskerettighederip (Inuit Pisinnaatitaaffiit Ilisimatusarfiup) pisuni arlalinni erseqqissaatigaa, unnerluutigisaasut pineqaatissinneqannngitsulli ukiuni amerlasuuni nalunaarsuiffimmi pinerluttunik pineqaatissinneqarsimasunik imaqartumiinnissaat ilisimatusarfiup tunngaviatigut eqqarsarnartoqartikkaa.

Tassungaaq atatillugu aamma oqaatigineqassaaq, pillaatissiinermut suliani inuup sananeqaataasa ilisarnaatai atorlugit paasiniaasarneq pillugu Europarådip kaammattuutaanni artikel 8, taamaallaat inunnit pillaatissiisarnermut inatsisinik unioqqutitsisimasunit inuup sananeqaataasa ilisarnaataannik nalunaarsuisoqarsinnaaneranik aalajangersaasoq. Danmarkip kaammattuut taanna ilanngiffigiumanagu toqqarnikuuaa.

Nalunaarsuiffik 2005-imi inuit 3.195-it ilisarnaataannik imaqarsimavoq³. Ilisarnaatinit taakkunanga 3.195-iusunut ilisarnaatit 64-it inuit pinngitsuutinneqarsimasut ilisarnaatigaat. Ilisarnaatillu 387-it inunnit uppernarsaatit pigineqartut naammannnginnerat pissutigalugu politiit unnerluutiginnngitsuugaanneersuupput.

Oqaatigineqareersutut peqqussummut missingiutip § 5, imm. 2-ata nunani EU-mut ilaasortaasuni inatsisit atortinneqarneranni oqartussaasut (politiit il.il.), pillaatissiinermut sulianik paasiniaanermut atugassanik inuup sananeqaataasa ilisarnaataannik nalunaarsuiffimmut paasissutissanik aallersinnaatippai. Tamanna Prümimi

² Justitsministeriaqarfimmit kisitsisit takutippaat, 1988-imi unnerluutigisaasimasut pinerluuteqarnermulli pineqaatissinneqannngitsut 12, 2%-ii ukiut tulluuttut tallimat ingerlaneranni pinerluutinut assingusunut pisuutinneqarsimasut. Innuttaasut tamaasa ilanngullugit ataatsimut agguaqatigiisillugu naatsorsoraanni taamak nalaataqaratarsinnaanermut ulorianartorsiorneq taamaallaat 0,28% -iuvoq.

³ Kisitsisip ullumikkut qaffasinnerungaatsiarnissaa ilimagisariaqarpoq; ukiup tulliani marloriaatinngoreersimammat, tamanna ilaatigut 2005-imi inatsimmik allannguinnikkut atorneqarfiata annertusineqarneratigut.

isumaqatigiisummik taaneqartoq (Prüm-afgørelse) 2008-meersoq, naalagaaffiit EU-mut ilaasortaasut akunnerminni inuup ilisarnaataannik nalunaarsuiffinnit, inussat ipaasa assilinerinik qamutillu motorillit nalunaarsorneqarfiinit ujaasisinnaanerannik ammaassisoq tunngavigalugu isigineqassaaq.

Prümimi isumaqatigiissut, naalagaaffiit EU-mut ilaasortat naalagaaffiit EU-mut ilaasortat allat nalunaarsuiffiini ilaatigut inuup sananeqaataasa ilisarnaataannik aallersinnaanerannut atatillugu paasissutissat illersorneqarnissaannik isumannaarisunik arlalinnik aalajangersagaqarpoq. Taamaalilluni ilaatigut paasissutissat kukkunillit naqqinneqartarnissaannut, inummut paasissutissat isertuuttariallit piiarneqartarnissaannut, ujaasinerit nalunaarsorneqarnissaannut kiisalu nalunaarsorneqarsimasup pisinnaatitaaffiinit taarsiiffigineqarnissamullu periarfissaanut malittarisassanik isumaqatigiissut imaqarpoq.

Ataatsimiititaliaq ima paasinnippoq, tassa aalajangersakkat taakku inuup sananeqaataasa ilisarnaataannut Kalaallit Nunaanneersunut toqqaannartumik atuutinngitsut.

Naalagaaffiit EU-mut ilaasortat – tassani aamma Danmark –EU-p iluani pinerluttulerinermi suleqatigiinnermut atatillugu inummut paasissutissat illersorneqarnerisa nukittorsarneqarnissaanik siunertaqarluni sinaakkutitut isumaqatigiisummumut aamma ilaapput.

Sinaakkutitut isumaqatigiissut Prümimi isumaqatigiisummumut naleqqiullugu siamasinnerusumik atuuffeqarpoq, apeqqutinilu Prümimi isumaqatigiissutip paasissutissat illersorneqarnissaannut malittarisassiuutinngisaani atorineqartarluni.

Sinaakkutitut isumaqatigiissut anguniakkatut siunniussaq eqqarsaatigalugu naalagaaffinnut ilaasortanut pituttuisuuvoq, taamaattorli tamatuminnga timitaliinerup qanoq ilusilerneqarnissaanik nunami namminermi oqartussaasut aalajangiisinnaatitaapput.

Sinaakkutitut isumaqatigiissut Danmarkimi nalunaarutikkut, inummut paasissutissat passunneqartarnerat pillugu inatsimmi § 72a-mit tunngavissinneqartukkut atuutsinneqarpoq⁴. Aalajangersagaq tunngavissiisoq taanna Kalaallit Nunaannut atuuttuulersinneqanngilaq, taamaalillunilu nalunaarut Kalaallit Nunaannut atuunnani.

Taamaammat Inatsisinut Ataatsimiititaliaq ima paasinnippoq, tassa inuup sananeqaataasa ilisarnaataat pillugit paasissutissat Kalaallit Nunaanneersut inuup sananeqaataasa ilisarnaataannik qitiusumik nalunaarsuiffimmi toqqortaatigineqartut, taamaallaat inummut paasissutissat passunneqartarnerannut inatsimmi kunnigip peqqussuteqarneratigut Kalaallit

⁴ Europæiske Unionimi Schengenimilu suleqatigiinnermi pinerluttulerinermik sulianik politiitigut eqqartuussiveqarnikkullu suleqatigiinnermi inummut paasissutissat illersorneqarnissaat pillugu nalunaarut nr. 884, 4. juli 2014-imeersoq.

Nunaannut atuutsilersinneqarsimasumi, paasissutissat illersorneqarnissaat pillugu malittarisassatigut toqqaannartumik ilanngutsinneqarsinnaasut.

3. Inatsisinut Ataatsimiititaliap inassuteqaataa

Inatsisinut Ataatsimiititaliaq isumaqarpoq inuup sananeqaataasa ilisarnaataannik qitiusumik nalunaarsuiffik paasiniaanermi sakkussaasoq iluatinnaatilerujussuaq, Kalaallillu Nunaanni politiinit aamma atorneqarsinnaasariaqartoq.

Ataatsimiititaliap tamanna tunggavigalugu peqqussummut missingiutit taakku marluk tapersersinnaavai.

Ataatsimiititaliap paasinninnera oqaatigineqareersutut tassaavoq, tassa inuup sananeqaataasa ilisarnaataannik qitiusumik nalunaarsuiffik pillugu inatsisip Kalaallit Nunaannut atuutsinneqalerneratigut immikkut Kalaallit Nunaannut inuup sananeqaataasa ilisarnaataannik nalunaarsuiffimmik nutaamik pilersitsisoqassanngitsoq, tamatumunngali taarsiullugu danskit inuup sananeqaataasa ilisarnaataannik qitiusumik nalunaarsuiffiata annertusineqarnissaa pineqartoq, taamaalillutik inuup sananeqaataasa ilisarnaataat Kalaallit Nunaanni pigineqartut nalunaarsuiffimmut tassunga ilanngutsinneqarlutik, taamaalillutillu Kalaallit Nunaanni politiit nalunaarsuiffimmik taassuminnga atuisinnaalerlutik.

Taamaammat ataatsimiititaliap siunnersuummik suliarinninnermini tunggaviutissimavaa, nalunaarsuiffik pillugu malittarisassanik Danmarkimi atuuttunik sanioqqutsinissamik Kalaallit Nunaanniit kissaateqarsinnaanermut naalagaaffimmi oqartussaasut akuersinissaat ilimagineqarsinnaagunangitsoq, tamanna assersuutigalugu inunnit pinngitsuutitaasimasunit inuup sananeqaataanut ilisarnaataatit qanoq annertutigisumik nalunaarsuiffimmiiginnartarnissaannut tunngatillugu.

Paasissutissat illersorneqartarnerat pillugu apeqqummut tunngatillugu ataatsimiititaliap paasisoraa, innuttaasut kalaallit nalunaarsuiffimmi nalunaarsorneqarsimasut paasissutissat illersorneqartarnerannut malittarisassanit innuttaasunut danskiusunut atuuttunit (toqqaannartumik) illersorneqanngitsut, taamaattumillu paasissutissat pineqartut kalaallinut tunngatillugu illersorneqarneri taamak qaffisitsiginngitsut. Tamanna Kalaallit Nunaata EUMut ilaasortaanginneranik pissuteqartumik.

Tamanna tunggavigalugu **Inatsisinut Ataatsimiititaliap** Naalakkersuisut **kaammattorpai**, Kalaallit Nunaanni inummut paasissutissat illersorneqartarnerannut malittarisassat atuuttut inuup sananeqaataasa ilisarnaataannik nalunaarsuiffimmut atatillugu illersuinerat qanoq annertutigisumik naammannersoq naalagaaffimmi oqartussaasunik oqaloqatiginnikkut isumaliutigeqqullugu, tassani aamma qanoq annertutigisumik Europæiske Unionimi Schengenimilu suleqatigiinnermi pinerluttulerinermik sulianik politiitigut

eqqartuussiveqarnikkullu suleqatigiinnermi inummut paasissutissat illersorneqarnissaat pillugu nalunaarutip Kalaallit Nunaannut atuutsinneqalersinnaanera iluaqutaasinnaanersoq isumaliutigalugu. Taamaattoqassappat inummut paasissutissat passunneqartarnerat pillugu inatsimmi § 72a-p Kalaallit Nunaannut atuutsinneqalernissaa piunasaqaataassaaq.

Ataatsimiititaliap isumaqatigiittup siunnersuutip akuersissutigineqarnissaa **inassutigaa**.

Taamak oqaaseqarluni Inatsisinut Ataatsimiititaliap siunnersuut aappassaaniigassannngortippaa.

Anders Olsen
Siulittaasoq
Siumut

Laura Táunâjik
Siumut

Iddimangiiu Bianco
Inuit Ataqtigiit

Debora Kleist
Inuit Ataqtigiit

Per Rosing-Petersen
Partii Naleraq